

In dalla Purtenza avon in Sursilvan

La Surselva ha negin candidat pil presidi dalla Lia Rumantscha

DA GIUSEP VENZIN / ANR

■ **Avon treis onns ha igl Engiadines Duri Bezzola gudignau il cumbat pil presidi dalla Lia Rumantscha encounter il Sursilvan Martin Mathiuet. Dals diesch vuschs surpli ein pliras stadas vuschs sursilvanas.** Dapi la fundaziun dalla Lia Rumantscha avon gleiti tschien onns ei aunc mai in Sursilvan staus alla testa dall'uniun tetgala dallas organisaziuns linguistics romontschas. Persuenter han plirs Sursilvans tgamunau la LR sco secretari, ils dus davos Gion Antoni Derungs e *Bernard Cathomas*. Il secretari actual ha bein in num sursilvan, *Urs Cadruvi* ei denton carschius si ell'Engiadina ed a Surmir ed habitescha actualmein a Trin. Il proxim candidat pil presidi duei *Johannes Flury* daventar. Tuttas organisaziuns linguistics sustegnan la candidatura digl um dalla Purtenza. Aschia daventa in um da lungatg tudestg il pli probabel president dalla pli impurtonta organisaziun linguistica romontscha avon ch'in Sursilvan ha la cuida da far quei. La Surselva ei dil reminent la pli gronda regiun romontscha. *Martin Mathiuet* ha buca priu posiziun en caussa. «Quei capetel ei serraus giu.»

Ils delegai han aunc il plaid

Las treis organisaziuns linguistics Surselva Romontscha, l'Uniun dals Grischs e l'Uniun Rumantscha Grischun Central sustegnan la candidatura da Johannes Flury. Quei han ellas fatg da saver ella comunicaziun tier l'abdicaziun da *Duri Bezzola*. *Vitus Gartmann* da Sevegin presidiescha dapi il 2013 la Surselva Romontscha. El conceda che la midada da president seigi buca stada prevedida: «Ins ha segir buca eligi *Duri Bezzola* culla finamira ch'el stetti mo treis onns en uffeci», di il veterinari. Ils delegai da Surselva Romontscha han aunc



Tgi succeda a Duri Bezzola en Casa Romontscha?

FOTO N. SIMMEN

buca giu la caschun da prender plaid en caussa, sco il president ha informau duei quei aunc succeder. Ina sesida sto pia haver liug en cuort, pertgei l'elecziun dil niev president dalla LR succeda gia la fin d'october a caschun dalla radunonza da delegai a Mustér. Speranza ch'ei detti tochen lu in candidat sursilvan, ha *Vitus Gartmann* negina. «Ella situaziun actuala fussi buca prudent da tschentiar in candidat sulet per dumignar in Sursilvan alla testa dalla LR.» Persunas cullas qualitats necessarias, denton era cul temps necessari per presidiar la LR hagi el en scadin cass buca anflau.

Avon in onn haveva igl anteriur cauredatur dalla «Gasetta Romontscha»

Giusep Capaul criticau a caschun dalla radunonza da Surselva Romontscha la munconza da Sursilvans alla testa da RTR e dallas organisaziuns romontschas. Gia lu haveva il deputau *Heinrich Berther* da Mustér constatau: «Nus havein negins candidats persuerter.»

Ina persuna respectada

Vitus Gartmann ha constatau che la Lia Rumantscha vegni attaccada da tuttas varts ed ei seigi ella situaziun actuala il meglier da haver ina persuna neutrala alla testa. «*Johannes Flury* ha ina buna reputaziun, el ha il respect ed il sustegn da tuttas organisaziuns.» Il candidat da president dalla LR ha tgamunau sco rec-

tur la scola aulta da pedagogia dil Grischun. Il schaner vargau ei igl um en pensiu vegnius eligius president dil cussegl d'administraziun dil gimnasi da Ftan ed ei seretrats dus meins pli tard. Sco *Johannes Flury* ei s'exprimius en viers La Quotidiana eis el semess a disposiziun per quei post. Sch'ei detti denton candidats valabels ord las regiuns seigi el denton era promts da renunziar ad in'elecziun.

Johannes Flury ei commember dalla Partida liberaldemocrata. Quei ein dil reminent era *Duri Bezzola* ed il secretari dalla Lia Urs Cadruvi. Il davos numnau candidescha per in sez el cussegl nazional.

La Surselva Romontscha propona il mistral *Donat Nay* da Trun sco niev commember dalla suprastanza dalla Lia Rumantscha. Actualmein representa *Rino Darms* leu la pli gronda regiun romontscha. El ha presidiau ensemen cun *Annalisa Cathomas* la Surselva Romontscha. Omidus han stuiu far plaz il 2013 als adherents dil romontsch sursilvan. Il temps da presidi da *Johannes Flury* vegn buca ad esser in liung. Da quei meini ei *Vitus Gartmann*. Il scolast secundar ed anteriur president communal da Trun fuss aschidadir el tschep da partenza per daventar igl emprem Sursilvan president dalla Lia Rumantscha.

Per buna comunicaziun ed engaschament

Possessurs da secundas habitaziuns han fundau la Cuminonza d'interess Tujetsch

DA HANS HUONDER / ANR

■ **150 personas ein separticipadas la dumengia vargada alla fundaziun dalla Cuminonza d'interess Tujetsch. Il proxim temps s'adresescha quella a tuts possessurs da secundas habitaziuns per aschia recaltgar aschi biars commembers sco pusseivel.** L'invitaziun alla radunonza da fundaziun ei succedida entras la grupp da coc dalla Cuminonza d'interess Tujetsch. Quella ha giu presentau las finamiras dall'uniun cun occasiun dalla scuntrada organisada il zercladur dalla vischnaunca da Tujetsch per indigens e hosps da vacanzas da tschep. La grupp ei sedrizzada als interessai cun in questinari. Cun sustegn dalla vischnaunca ein ils possessurs da secundas habitaziuns da Tujetsch allura vegni orientai ed envidai alla radunonza da fundaziun. Sco quei che l'emprema presidenta dall'uniun, l'antieriura cussegliera nazionala *Vreni Müller-Hemmi*, di, han rondond 330 personas demussau lur interess per la cuminonza entochen l'entschatta settember. Tujetsch dumbra rodund 1000 habitaziuns da vacanzas, da quei ina gronda part secundas habitaziuns.

Dialog constructiv

Igl artechel d'intent, approbaus la dumengia dalla radunonza da fundaziun, sebase sin ils resultats dalla retschera. El cuntegn las finamiras dalla cuminonza che cumpeggia las possessuras ed ils possessurs da secundas habitaziuns d'ordeifer sco era affittaders permanent. «La fi-

namira principala ei segiramein il dialog constructiv cun la vischnaunca e cun organisaziuns dil turissem», puntuescha *Vreni Müller-Hemmi* ch'ei oriunda da Cuera e che habitescha a Turig. En special intendan ils statuts dalla cuminonza la representanza dils interess e dils giavischs dallas commembras e dils commembers en viers las autoritads, organisaziuns publicas e privatas. L'uniun avisescha in dialog regulau, en special pertuccont taxas e contribuziuns moderadas, sco era la purschida turistica. Ella vul s'engaschar en favur d'in svilup turistic persistent en collaboraziun cun indigens

interessai ed organisaziuns localas e regionalas sco era la promozion da contacts vicendeivels. Ils commembers duein vegnir orientai davart svilups relevants. *Vreni Müller-Hemmi* ei fetg cuntenza cun quella emprema radunonza: «Nus havein saviu presentar cheu nossas finamiras. Il clima ei staus fetg positiv.» Davart dalla vischnaunca ein il president communal *Beat Röschlin* ed il gerau *Christian Albin* stai presents. *Beat Röschlin* beneventa l'iniziativa dalla cuminonza. La suprastanza communal hagi tut interess da menar discuors cun quella.

Müller-Hemmi presidenta

Alla radunonza da fundaziun ei *Vreni Müller-Hemmi* – la presidenta dalla grupp da coc – vegnida tscharnida sco emprema presidenta dall'uniun. Vice-president daventa *Christoph Marugg*. Ulteriurs commembers dalla suprastanza ein *Kurt Baumgartner*, *Beatrice Bosshart*, *Daniel Krähenbühl*, *Markus Müller* e *Werner Strelbel*. El center dil program da lavur per 2015/16 stat il dialog dalla suprastanza cun la vischnaunca davart informaziuns transparentas en connex cun las entradas ed expensas sedadas entras la nova lescha da turissem. Medemamein vul la suprastanza sefatschentiar dil resultats dalla retschera. Sin fundament da quellas duei vegnir tschentau prioritads concernent la purschida turistica.

Plinavon intendan ils responsabels da francar la struttura dalla Cuminonza d'interess Tujetsch, en special pertuccont la comunicaziun. Per conclusiun dalla radunonza ha *Vreni Müller-Hemmi* puntuau: «La confidonza demussada entras las commembras ed ils commembers dalla cuminonza dat gronda motivaziun alla suprastanza da s'engaschar.» La fin da november ei previu ina emprema scuntrada dils representants dalla cuminonza cun las autoritads communalas. Leu duei ella vegnir orientada davart la purschida d'unviern.

La carta da hosps introducida per la stad vegn beneventada grondamein dalla Cuminonza d'interess Tujetsch.



L'emprema suprastanza dalla Cuminonza d'interess Tujetsch. Amiez la presidenta *Vreni Müller-Hemmi*.

MAD

UFFECI STRADAL

Via da Pardomat vegn serrada parzialmein

(anr) La via cantunala da Pardomat sil tschancun denter la Punt Russein e Maderal resta serrada da gliendisdis, ils 14 da settember entochen venderdis, ils 30 d'october 2015 mintgamai da gliendisdis allas 07.00 entochen venderdis allas 18.00. La bloccada vala per igl entir trafic ed ei necessaria per motivs da lavurs da construcziun e cuvrida. In sviamet ei pusseivels sur Cavardiras per vehichels entochen 11 tonnas. Pedunzs e ciclists san passar il piazzal.

RECLAMA

FDP
Die Liberalen

Angela Casanova-Maron

LISTE 1

in den Nationalrat
Infos auf www.angela-casanova.ch

Für Arbeitsplätze in Graubünden
engagiert kompetent konsequent